

Les bèyoues d'mairtchandise

Lai Didi é tot vu dains sai vie d'gérante. Les bèyoues d'mairtchandise aint s'vent tchandise.

È y é t'aivu : lai Coopérative d'Laidjoux, Perret-Gentil d'Lai Frégatte d'lai Tchâd-de-Fonds, Familia que voyait qu'lai Didi f'sèsse 100'000.- d'affaires pai ans, Uni-Gros èt Vis-à-Vis.

Aivô Lai Frégatte, c'était l'bon temps, le patron é euffri en totes les gérantes èt pe tus les gérants in to chu les trôs lais.

Lai bême

An trovait in pô d'tot tchie lai Didi. Dains çte bême d'Ali Baba, è y aivait l'frigo aivô le laicé, le burre, le burre de braiche, les yoghourts, le fremaidge, le fremaidge po lai fondue, le fremaidge de Fonet d'dôs, le Moron.

Dains l'congélateur, an trovait des p'téts pois, des faïviôles, di pôchon, d'lai yaice à tchâtemps.

In côp, i aivô fâte d'enne câle è vis, eh bîn, i en aî aitch'tè enne...tchie lai Didi !

Tchie lée, te poyais aichbîn trouaie : di flé, des aideuelles, des brêches de tchâsse, des caîrtes è envie èt pe des caîrtes po djûre, des tchâsses, des tiulattes de traivaiye, des produits po nantayie, les dgens èt pe les aijements, des breutches, des paittes è rétiurie, d'lai gotte, d'lai tchée.

Ah ! lai tchée ! Trôs è quatre côps pai an, è y en aivait d'lai boenne. Ç'ât lai Didi que s'ottiupait d'lai saléjon des mochés de tchée d'pôs èt pe ç'ât l'Roger que lai f'mait dains in p'tét saitchou. Eh bîn sai baidjoûe tiûe dains les fie-tchôs, qu'ât-ce qu'elle était boenne !

Le contrôle sanitaire v'niait po voi des côps ço que s'péssait tchie lai Didi. Vos cogniâtes l'hichtoire, è y é aidé ôtçhe que coisse d'aivô ces dgens en graivatte ! Dâli, in bé djo, an ont trovè chu lai pôrte d'l'airmiere di froid in bout d'feuya vouè in docteur aivait grayn'nè que nôs n'aivîns p' pu prou de p'têtes bêtes dains l'échtomaic, qu'è fayait airrâtaie de trap nantayie èt laichie les afaints botaie les mains dains lai terre èt pe être pait.